




11 de xaneiro de 2012. Coma nun pesadelo recorrente, acaban de resucitar **3 proxectos de minicentraís**


para o
río Loio

iniciadas en 2005. ADEGA tivo coñecemento delas en 2007, cando

[solicitamos á confederación hidrográfica](#)

que se desestimaran os aproveitamentos "Loio", "Suar" e "Higón" polo seu impacto na bacía do Loio, un río practicamente virxe e con especies en perigo de extinción. Ao parecer, a actual situación resulta moi favorábel para as empresas (inmobiliarias reconvertidas, fondos de investidores e eólicas): Por unha banda, o plano hidrolóxico Miño-Sil, ao contrario que o de Galiza-costa, non pecha a porta a novos aproveitamentos hidroeléctricos; por outra, a ampliación da Rede Natura presentada en 2011 pola Xunta deixa fóra do novo LIC Miño-Neira (842 Ha) a este río, que sí estaba incluído na proposta de 2008 do bipartito (18210 Ha). Será casualidade ou máis ben causalidade?

Tres minicentraís consecutivas, situadas unha tras de outra, curtocircuitarán por completo o río Loio (Paradela, Lugo) convertíndoo nunha canle morta. Consecutivamente, chucharán o exíguo caudal ecolóxico que deixe a instalación precedente até que a última minicentral libere o que quede ao encoro de Belesar.



Ao abeiro do decepcionante [Plano Hidrolóxico Miño-Sil](#) que malia a recoñecer a

sobreexplotación hídrica desta bacía, deixa a porta aberta a novos aproveitamentos, e "grazas" á [cativa ampliación da Rede Natura](#) proposta pola Xunta do PP que deixa fóra do LIC Miño-Neira ao 95,4% da superficie proposta polo bipartito en 2008 (842 fronte a 18210 hectáreas), a porta queda aberta para continuar coa depredación dos nosos ríos, tan só aprazada dende 2005.

No entanto, dende aquela as cousas mudaron substancialmente: o grao de concienciación da sociedade galega e, consecuentemente, os avances legislativos introducidos (Directiva Marco da Auga, Lei de Defensa dos Ríos Galegos, Planos hidrolóxicos e de bacía máis sustentábeis, revisión dos caudais ecolóxicos...) fan que as cousas non estean igual que na época do saqueo hídrico do fraguismo, mais as ameazas non desapareceron.

A [Lei de Defensa dos Ríos Galegos](#), aprobada por unanimidade en 2006 logo dunha ILP (Iniciativa Lexislativa Popular), que foi a máis apoiada da historia do país, establece a obriga da Xunta de preservar a calidade ambiental dos nosos ríos, mesmo dos que a xestión hidráulica corresponde ao estado.

Toda a bacía do Loio encádrase tamén dentro da Reserva da Biosfera Terras do Miño, declarada en 2002 pola UNESCO. Atendendo aos requirimentos desta figura de protección internacional, as alteracións derivadas do aproveitamento hídrico resultan incompatíbeis co obxectivo de "promover un desenvolvemento económico e humano sustentábel baseado na conservación dos recursos naturais e dos hábitats presentes neste medio".

E por se fora pouco o río Loio foi declarado pola Xunta ENIL (Espazo Natural de Interese Local) en outubro de 2011 a proposta do concello de Paradela e en atención aos valores naturais deste espazo. Entre eles destaca a presenza cando menos de 5 hábitats de interese europeo (4090 breixeiras ortomediterráneas endémicas, 4030 breixeiras secas europeas, 6430 megaforbios eutrofos hídricos, 9230 carballeiras galaico-portuguesas, e 91E0* bosques aluviais con ameneiros e freixos), este último considerado prioritario. Entre a fauna, hai 22 especies protexidas, incluíndo o mexilón de río (*Margaritifera margaritifera*) considerado o molusco máis ameazado en Galiza e catalogado como en perigo de extinción. A principal ameaza para esta especie e causa da súa regresión é, precisamente, a construción de minicentrais e as obras hidráulicas nos ríos. Habida conta de que o mexilón de río conta cun Plano de Conservación / Recuperación rematado en 2009, o que debería facer a Xunta é aplicalo e prohibir, dado o seu carácter preeminente sobre calquera outra planificación, a instalación de minicentrais neste río.

Neste senso, ADEGA esixe da Xunta e da Confederación Hidrográfica Miño-Sil que rematen dunha vez co "fraguismo" ambiental nos nosos ríos. Se ben xa non son masaxistas, cuñados de directores xerais e mulleres de ex-embaixadores os que se lucran indecentemente cos nosos ríos e montes, agora tócalles ás [multinacionais enerxéticas](#), ás inmobiliarias reconvertidas e aos fondos de investimento sacar tallada desta desfeita ambiental, coa cooperación necesaria das administracións.